

Schurnal regional en lingua taliana

Chantun Grischun e RSI sa cunvegnan

■ (anr/fa) Il chantun Grischun e la Radiotelevisione svizzera RSI han chattà ina soluziun: Causa che RSI è pronta d'extender la purschida cun in schurnal al radio retira il chantun ses recurs da surveglianza. «Jau sun fitg satisfatg da pudair seser vi da la medema maisa cun ils responsabels da la RSI e preschentar il resultat da nossas tractativas», ha ditg mesemna il president da la regenza grischuna *Claudio Lardi* a Cuira a chaschun da l'orientaziun dals meds da massa. D'atun 2009 avevan inoltrà il chantun Grischun ensem cun quatter ulteriurs recurrents cun domicil en il Grischun talian tar l'Uffizi federal da communicaziun (Udcom) a Bienna in recurs da surveglianza. Quel sa drizzava cunter la societad svizra da radio e televisiun SRG SSR idée suisse e cunter la societad cooperativa per la radiotevisiun svizra da lingua taliana RSI sco era cunter la societad cooperativa per la radiotevisiun da la Svizra taliana (Corsi). Sco represchendant dal chantun ha declerà l'advocat *Luca Tenchio* las raschuns per il recurs.



Roberto Scolla e Marco Petrelli (da san.), dus dals schurnalists da la redacziun RSI a Cuira, en acziun.

FOTO F. ANDRY

«L'incarica da concessiun betg ademplida»

Sco che Tenchio ha ditg è la SRG obligada dad infurmar «da maniera equivalenta» la populaziun en tut las quatter linguas svizas. «Ils resultats d'in monitoring han dentant mussà che la RSI infurmescha memia pauc la populaziun dal Grischun talian davart novitads era dal Grischun tudestg e rumantsch», ha menziunà l'advocat, «fin uss vegni infurmà surtut dals eveniments che capitentan en las Vals talianas.» Ils recurrents e las adversarias dal recurs èn alura sa scuntrads per tractar sut la direzziun da l'Ufcom. *Dino Balestra*, il directur dal RSI, ed *Edy Salmina* ch'è responsabel

tar la RSI per l'infurmaziun, han preschentà lur proposta.

«Dapli purschida malgrà las finanzas stgarsas»

Balestra ha menziunà la situaziun finanziaria difficila da la SRG: «Las consequenzas da quella badan surtut las partiziuns pitschnas sco la RSI, tuttina avain nus fatg valair che nus na sajan betg mo responsabels per il Tessin, mabain per tut ils Svizzers da lingua taliana.» Ins haja chattà uss ina soluziun clera e transparenta che custa baingea dapli, «nus essan però persvas ch'ella guida a satisfar ils basegns da las minoritads en Svizra.» Salmina ha explitgà co ch'els fan quai: La

RSI s'ha declerada pronta d'extender sia purschida vertenta e d'emetter mintgadi, da glindesdi fin venderdi vers las 19.00, in schurnal da radio en lingua taliana da 5 fin 10 minutas. «Quest schurnal regional cun infurmaziuns da tut il chantun po vegnir recepì sin l'emettur d'UUC Rete Uno mo en il chantun Grischun», ha'l ditg, «en ina fasa inziala vegn el a cuntanscher stgars trais quarts da la populaziun grischuna, igl è dentant previs d'extender il territori d'emissiun.»

Ulteriuras 2,5 plazzas da lavur

Per realisar questa purschida extendida dovran ins dapli collavuratur: «Il team da la RSI a Cuira duai vegnir engrondi

da quatter sin maximalmain 6,5 plazzas da lavur», ha cuntinuà Edy Salmina, «quels trais redactors che partan las 2,5 plazzas da lavur na ston però betg esser staziunads en mintg cas en la chapitala grischuna, els pon era lavurar p. ex. a Lugano u a Turitg.» El nun ha numnà nagin import, quants custs che quai vegn a chaschunar a la RSI. Dacurt ha la scheffa dal Datec, la presidenta da la confederaziun *Doris Leuthard*, dà a la RSI la permissiun per questa nova purschida. Uschia han ils recurrents laschà crudar il recurs da surveglianza. L'emprim schurnal regional en lingua taliana vegn emess il pli tard al cumenzament da favrer 2011.